

## KURSUS KEPIMPINAN HYBRID PERTAMA KOLEJ TUN DR ISMAIL, UNIVERSITI PUTRA MALAYSIA

Oleh: Nur Husnina Mohamad Yunus



**SERDANG, 30 Mac hingga 4 April** - Majlis Perwakilan Kolej, Kolej Tun Dr Ismail, Sesi 2020/2021, Universiti Putra Malaysia (UPM) adalah merupakan yang terawal menganjurkan kursus kepimpinan kolej kediaman secara hybrid iaitu Kursus Kepimpinan SmartLEAD 2021 yang telah dijalankan selama enam hari.

Kursus Kepimpinan SmartLEAD 2021 ini bertujuan untuk melahirkan pemimpin bagi menerajui kepimpinan Kolej Tun Dr Ismail pada sesi hadapan yang menyasarkan peserta daripada kalangan pelajar tahun satu dan telah disertai oleh 60 orang pelajar Kolej Tun Dr Ismail (KTDI).

Pengetua KTDI, UPM, Prof. Dr. Aminuddin Hassan berkata kursus ini diharap dapat membentuk para peserta supaya berfikir secara lebih berinovasi, kreatif dan kritis sekaligus menjadi pemimpin di peringkat kolej sebagai Majlis Perwakilan Kolej serta secara tidak langsung menjadi tunggak utama kolej dan mengharumkan lagi nama Kolej Tun Dr Ismail.

*"Even the best can be improved,* semoga kecemerlangan demi kecemerlangan bakal tercipta dan nama Kolej Tun Dr Ismail terus megah di persada UPM, kebangsaan mahupun antarabangsa," katanya.




Penasihat Kursus Kepimpinan SmartLEAD 2021, Prof. Madya Dr. Yap Wing Fen berkata organisasi kepimpinan pelajar di kolej kediaman merupakan fokus penting dalam pembentukan sahsiah mahasiswa sebagai pelengkap kepada kecemerlangan dan keunggulan akademik.

“Selaras dengan keperluan tersebut, maka, Pihak Pengurusan KTDI, UPM melalui Majlis Perwakilan Kolej KTDI telah mengambil inisiatif untuk menganjurkan Kursus Kepimpinan SmartLEAD 2021 bagi memberi ruang dan platform kepada para pelajar untuk meningkatkan nilai tambah dalam aspek kemahiran insaniah terutamanya berkaitan kepimpinan,” katanya.

Pengarah kursus, Suzaifi Sukri berkata kursus ini diubah kepada kaedah hybrid untuk disesuaikan dengan norma baharu ekoran pandemik dan telah berlangsung dengan jayanya serta mencapai objektif kursus.

“Walaupun Kursus Kepimpinan SmartLEAD kali ini tidak dapat dilaksanakan secara fizikal, namun, saya yakin bahawa input yang para peserta peroleh adalah setanding sekiranya kursus ini dijalankan secara bersemuka,” katanya.



Peserta kursus, Nazreen Samuri berkata Kursus Kepimpinan SmartLEAD 2021 adalah salah satu langkah proaktif yang telah diambil kerana melalui kursus ini, peserta dapat mengenali lebih ramai lagi pelajar-pelajar KTDI yang lain di samping mempelajari banyak ilmu kepimpinan daripada mereka yang berpengalaman.

"Kursus ini sangat menarik walaupun hanya dilaksanakan secara atas talian. Saya rasa bersyukur menyertai kursus ini kerana walaupun hanya dilaksanakan secara atas talian, banyak perkara tentang kepimpinan telah saya dan peserta-peserta lain dapat pelajari, semoga apa yang kita peroleh dapat diaplikasikan sebaik mungkin kelak," katanya.



Kursus ini juga telah dihadiri oleh alumni KTDI iaitu Dr. Mohd Mokrish dan Prof. Madya Dr. Nurul Hayah sebagai penceramah jemputan bagi Slot Kepimpinan dan Personailti dan Slot KTDI Juara.